

UDHËZIM
Nr. 22, datë 27.10.2022

**PËR PËRCAKTIMIN E RREGULLAVE, PROCEDURAVE DHE
METODOLOGJISË PËR SUBJEKTET DHE KLIENTËT FAMILJARË, QË
PËRFITOJNË NGA MASAT E FINANCIMIT PËR KURSIMIT E ENERGJISË NGA
PANELET DIELORE**

Në mbështetje të nenit 102, pika 4, të Kushtetutës dhe të nenit 7, të aktit normativ nr. 14, datë 5.10.2022, “Për marrjen e masave të veçanta gjatë kohëzgjatjes së gjendjes së emergjencës në furnizim me energji elektrike”, ministri i Infrastrukturës dhe Energjisë

UDHËZON:

I. DISPOZITA TË PËRGJITHSHME

1. Agjencia e Eficiencës së Energjisë (Agjencia) financon projektet për instalimin e paneleve diellore për ngrohjen e ujit sanitar për klientët familjarë.

2. Financimi përfshin 70% të vlerës së investimit. Financimi i masës mbështetëse bëhet vetëm nga të ardhurat për shërbime ndaj të tretëve, të arkëtuara nga Agjencia gjatë vitit buxhetor. Të ardhurat e Agjencisë për këtë qëllim, të cilat nuk janë shpenzuar gjatë vitit ushtrimor, në zbatim të aktit normativ, mbarten në vitin pasardhës.

3. Agjencia publikon në fazën e parë të procesit subjektet që kanë shfaqur interes për ofrimin e shërbimit të shitjes dhe instalimit të paneleve diellore për ngrohjen e ujit sanitar.

4. Subjektet që ofrojnë shërbimin e furnizimit dhe të instalimit të paneleve diellore për ngrohjen e ujit, përzgjidhen nga Agjencia në bazë të kriterëve të përcaktuara në këtë udhëzim.

5. Agjencia publikon në faqen e saj të internetit thirrjen për subjektet që ofrojnë tregtimin dhe instalimin e sistemeve diellore. Afati i lejuar për dërgimin e dokumentacionit të nevojshëm për pjesëmarrje nga subjektet tregtare nuk mund të jetë më pak se 12 ditë pune.

6. Subjektet e kualifikuara nënshkruajnë një kontratë standarde me Agjencinë në të cilën përcaktohen kushtet e përgjithshme dhe të veçanta të kontratës, duke përfshirë dhe masat administrative, për rastet e tilla si: mosrespektimi i afatit, mospërfundimi i instalimit, mosfunksionimi i sistemit, mospërgjigjja brenda periudhës së garancisë. Me firmosjen e kontratës, Agjencia publikon në faqen e saj të internetit listën e subjekteve që kualifikohen për ofrimin e shërbimit.

7. Klientët familjarë aplikojnë për përfitimin e financimit në platformën *online* të krijuar për këtë qëllim pranë Agjencisë. Aplikimi duhet të jetë në përputhje me kushtet dhe kriteret e përcaktuara në këtë udhëzim.

8. Aplikimet për përfitimin e financimit trajtohen dhe miratohen sipas radhës që paraqiten. Menjëherë pas vlerësimit, Agjencia njofton aplikuesin për miratimin ose refuzimin e kërkesës për financim. Për aplikimet që refuzohen, Agjencia njofton në çdo rast arsyet e refuzimit në rrugë elektronike. Klientët familjarë, aplikimi i të cilëve është refuzuar, nuk mund të bëjnë rregullime në aplikimin ekzistues, por kanë të drejtë të aplikojnë përsëri, duke çelur një aplikim të ri.

II. KRITERET PËR PJESËMARRJEN E SUBJEKTEVE QË OFROJNË TREGTIMIN DHE INSTALIMIN E SISTEMEVE DIELORE

1. Subjektet që shprehin interes për të marrë pjesë në këtë procedurë duhet:

a) Të jenë të regjistruar në Qendrën Kombëtare të Biznesit, sipas legjislacionit në fuqi; të kenë status aktiv dhe të kenë në fushën e veprimtarisë objektin e financimit;

b) Të vërtetojnë se nuk kanë detyrime ndaj organeve tatimore dhe të energjisë elektrike;

c) Të disponojnë dokumente që vërtetojnë se sistemi plotëson standardet evropiane dhe certifikimin “CEN Solar Keymark”, që garanton cilësi të lartë të produktit, siguri në përdorim, jetëgjatësi dhe rendiment të lartë, si dhe të ketë karakteristikat teknike të mëposhtme;

- i. i gjithë sistemi të jetë me rezistence të lartë ndaj ndryshkjes;
 - ii. të jetë i përshtatshëm, si për montim në çati, ashtu dhe në tarracë;
 - iii. të jenë prodhim i vitit 2022;
 - iv. tubat e brendshëm të jenë tërësisht prej material bakri;
- Specifikimet e hollësishme për të garantuar qëndrueshmërinë e sistemit për të gjithë përdhën e garancisë përzgjidhen nga Agjencia dhe publikohen në faqen e saj zyrtare.

d) Të disponojnë skedën teknike të instalimit termik konform kriterëve teknike të kërkuara;

e) Oferta financiare për instalimin termik për një klient familjar përfshin edhe kostot e transportit dhe të instalimit. Oferta financiare do të jetë detyruese dhe ofertuesi nuk mund të lëshojë faturë me çmim të ndryshëm nga oferta e paraqitur.

2. Lista e dokumenteve që duhet të paraqesin subjektet:

- a) certifikatë regjistrimi/ NIPT;
- b) ekstrakti historik;
- c) vërtetim për pagim detyrimesh tatime;
- d) vërtetim për shlyerjen e të gjitha detyrimeve të maturuara të energjisë elektrike të kontratave energjetike të subjektit të regjistruar në Shqipëri;
- e) të paraqesë certifikimin “CEN Solar Keymark” për panelet që ofron;
- f) të deklarojë sasinë e paneleve diellore të disponueshme për klientët familjarë;
- g) të deklarojë një listë të qyteteve ku mund të ofrojë shërbimin;
- h) të sigurojë përmes një deklarate garancinë e sistemit të panelit diellor;
- i) të paraqesë skedën teknike të paneleve që ofron;
- j) të disponojë një deklaratë përgjegjësie për çdo kontratë shitjeje, sipas së cilës pranon kryerjen e shërbimit kundrejt klientëve familjarë nga shitja deri tek kolaudimi i sistemit termik për prodhimin e ujit të ngrohtë sanitar, brenda datës 30 janar 2023;
- k) të angazhohet nëpërmjet një deklarate, ku pranon se mënyra e kreditimit për tregtimin, shitjen dhe instalimin e sistemit termik do të jetë vetëm 30% të financimit nga klientët familjarë dhe 70% të investimit nga Agjencia;
- l) të paraqesë formularin e vetëdeklarimit, sipas shtojcës 1.

III. KRITERET DHE KUSHTET E APLIKIMIT TË KLIENTËVE FAMILJARË

1. Klientët familjarë që kërkojnë të aplikojnë për përfitimin e mbështetjes për realizimin e investimit duhet të plotësojnë kriteret e mëposhtme:

- a) të paraqesin një kontratë ekzistuese me OSHEE/Furnizuesi i Shërbimit Universal ku të jenë të klasifikuar si abonent familjar dhe një historik të konsumit të energjisë për të paktën 6 muaj, që nuk duhet të jetë më pak se 250 kwh për çdo muaj;
- b) të paraqesin vërtetim debie nga OSHEE nga *e-Albania*, që të vërtetojë se nuk janë debitorë për pagesën e energjisë elektrike, ose janë në një marrëveshje për shlyerjen me këste të detyrimeve të prapambetura;
- c) kriteret e pikës “a” nuk zbatohen për abonentët që klasifikohen si konsumatorë që trajtohen me ndihmë ekonomike nga ministria përgjegjëse për punët sociale;
- d) të zotërojnë certifikatë pronësie për banesën ose njësinë e banimit (rastet që janë në proces legalizimi nuk do të konsiderohen).

2. Lista e dokumenteve që duhet të paraqesin konsumatorët familjarë për aplikim në platformën *online*:

- a) letërnjoftimi (karta e identitetit);
- b) certifikata familjare;
- c) certifikatë pronësie;
- d) faturat e energjisë elektrike për të paktën 6 muajt e fundit të konsumit;
- e) vërtetim debie nga OSHEE-ja të marrë nga *e-Albania* që abonenti nuk rezulton debitor për pagesën e energjisë elektrike ose që ka nënshkruar një marrëveshje për pagesën me këste të detyrimeve të prapambetura;

f) foto në të cilat tregohet qartë pamja e jashtme e objektit ku do të instalohen panelet diellore për ngrohjen e ujit;

g) për konsumatorët që trajtohen me ndihmë ekonomike, dokument që vërteton se janë përfitues të ndihmës ekonomike;

h) formulari e vetëdeklarimit sipas shtojcës nr. 2.

IV. MËNYRA E APLIKIMIT DHE E FINANCIMIT TË KLIENTËVE FAMILJARË

1. Të gjithë klientët familjarë që plotësojnë kriteret e kreut II, do të aplikojnë në portalin e publikuar në faqen zyrtare të Agjencisë: www.eficenca.gov.al, duke ngarkuar të gjithë dokumentacionin e kërkuar. Portali bën renditjen e dy mijë aplikimeve të para që pajisen me numrin përkatës në mënyrë automatike.

2. Brenda 2 ditëve punë nga data e pajisjes me numrin përkatës, Agjencia miraton ose refuzon aplikimin dhe njofton aplikuesin në mënyrë elektronike.

3. Me marrjen e konfirmimit nga Agjencia, klienti familjar duhet të konfirmojë porosinë të subjekti tregtues brenda 7 ditëve pune, duke paguar 30% të faturës. Mandati i pagesës së bërë dërgohet te Agjencia dhe regjistrohet.

4. Klientët familjarë që nuk konfirmojnë porosinë dhe, si rezultat, nuk dërgojnë mandatin e pagesës prej 30% të faturës brenda afateve të pikës 3 të këtij kreu, humbasin të drejtën e financimit. Këto klientë kanë të drejtë të aplikojnë përsëri, duke çelur një aplikim të ri.

5. Me plotësimin e dy mijë aplikimeve të para, klientët familjarë që tërhiqen nga aplikimi për arsye vetjake ose arsye të tjera të përcaktuara në këtë udhëzim, pozicioni i tyre plotësohet nga aplikuesi i radhës, deri në riplotësimin e kuotave.

6. Nga momenti i parapagimit të faturës nga klienti familjar, subjektet tregtare duhet të instalojnë sistemin brenda 15 ditëve pune. Masat administrative për mosrespektimin e afateve parashikohen në kontratën standarde.

7. Klientët familjarë, në çdo rast, duhet të zbatojnë legjislacionin në fuqi për instalimin e këtyre paneleve, si dhe për marrjen e dakordësisë nga bashkëpronarët e tjerë nëse është e aplikueshme.

8. Financimi përfshin 70% të vlerës impiantit dhe tëkostos së instalimit. Financimi i masës mbështetëse bëhet vetëm nga të ardhurat për shërbime ndaj të tretëve, të arkëtuara nga Agjencia gjatë vitit buxhetor.

9. Financimi nga Agjencia realizohet në favor të subjektit të përzgjedhur nga klienti familjar.

10. Financimi do t'i jepet subjektit në përputhje me termat e parashikuar, sipas kontratës standarde me Agjencinë.

V. ZBATIMI DHE METODOLOGJIA E MONITORIMIT

1. Autoriteti përgjegjës për ndjekjen e këtij procesi është struktura e posaçme e krijuar në OSHEE Group, Task-Forca e Energjisë, e cila realizon procesin e monitorimit dhe verifikimit të investimeve të realizuara me mbështetjen e kësaj thirrje përmes një procedure transparente.

2. Me përfundimin e investimit subjektet tregtare njoftojnë përmes adresës elektronike ose pranë zyrave të Agjencisë, brenda 5 ditëve nga momenti i instalimit, të dhënat e mëposhtme:

i. nr. serial të pajisjeve të instaluar;

ii. garancinë e marrë nga furnizuesi i pajisjes;

iii. kopje e faturës;

iv. foto të të gjithë pajisjeve që janë përfshirë në investim dhe foto të objektit gjatë punimeve dhe pas realizimit të investimit;

v. deklarata e klientit familjar që ka marrë shërbimin, sipas shtojcës së vendosur në kontratën standard midis subjekteve tregtuese dhe Agjencisë.

3. Task-Forca e Energjisë njoftohet për çdo instalim të përfunduar dhe që ka dërguar të dhënat e mësipërme.

4. Për çdo mospërputhje, parregullsi dhe falsifikim, Task-Forca e Energjisë merr masat përkatëse dhe subjekti tregtues është i detyruar të kthejë të gjithë shumën e përfutur.

5. Agjencia bashkërendon proceset e përcaktuara në këtë udhëzim dhe trajton sipas rastit problematikat që paraqiten nga klientët familjarë. Për çdo shkellje të subjekteve në dëm të klientëve familjarë, Agjencia aplikon masa administrative sipas kontratës.

Ky udhëzim hyn në fuqi pas botimit në Fletoren Zyrtare.

ZËVENDESKRYEMINISTËR
DHE MINISTËR E INFRASTRUKTURËS DHE ENERGJISË
Belinda Balluku

SHTOJCA 1
FORMULARI I VETËDEKLARIMIT PËR SUBJEKTIN TREGTAR

Unë, i nënshkruari, _____, deklaroj këtu, se:

- Kam lexuar dhe kuptuar kushtet dhe detyrimet e thirrjes.
- Plotësoj kriteret teknike të depozitës së ujit dhe të panelit diellor, sipas kërkesave të Agjencisë së Efiçencës së Energjisë.
- Në çmimin e ofruar për klientët familjarë të përzgjedhur përfshihet edhe kostot e transportit dhe instalimit.
- Do të zbatoj legjislacionin në fuqi për instalimin e panelit diellor dhe kushtet përkatëse teknike.
- Pranoj kushtin e pranimi të 30% të financimit nga klientët familjarë dhe 70% të investimit nga Agjencia për Efiçencën e Energjisë pas instalimit të panelit diellor.
- Informacioni i përfshirë në këtë aplikim, së bashku me çdo deklaratë të shprehur është, në dijeninë time, i vërtetë, i saktë dhe i plotë.
- Nëse ndonjë nga deklaratat e bëra në aplikim është e pasaktë, e paplotë, e rremë apo me karakter mashtrues ndaj Agjencisë për Efiçencën e Energjisë, mundet, në diskrecionin e tij absolut, të ndërmarrë masat e duhura. Mirëkuptoj se të tilla masa mund të çojnë në mospërfshirjen e aplikimit për shqyrtim të mëtejshëm dhe/ose kthimin mbrapsht të të gjithë financimit të përfutur.

Mbiemri/Emri dhe firma e aplikantit

SHTOJCA 2
FORMULARI I VETËDEKLARIMIT PËR KLIENTIN FAMILJAR

Unë, i nënshkruari, _____, deklaroj këtu, se:

- Deklaroj kam lexuar dhe kuptuar kushtet dhe detyrimet e thirrjes.
- Deklaroj se informacioni i përfshirë në këtë aplikim, së bashku me çfarëdo deklarate të shprehur është, në dijeninë time, i vërtetë, i saktë dhe i plotë.
- Pranoj se, nëse ndonjë nga deklaratat e bëra në aplikim është e pasaktë, e paplotë, e rremë apo me karakter mashtrues ndaj _____, mundet, në diskrecionin e tij absolut, të ndërmarrë masat e duhura. Mirëkuptoj se të tilla masa mund të çojnë në mospërfshirjen e aplikimit për shqyrtim të mëtejshëm dhe/ose kthimin mbrapsht të të gjithë financimit të përfutur.
- Nuk jam nën hetim, procedim penal apo dënuar për ndonjë vepër penale nga institucionet e drejtësisë në Shqipëri.

Mbiemri/Emri dhe firma e aplikantit

